



## БҮГІНГІНІҢ БАС ТАҚЫРЫБЫ

# ЕЛОРДА ДІНАРАЛЫҚ ДИАЛОГ АЛАҢЫНА АЙНАЛДЫ



Қазақстан тағы да дүниежүзін рухани бірлікке, өзара сенімге, бейбітшілікке шақыратын алаңға айналмақ. Яғни, әлемдік діндер мен дәстүрлі конфессия басшыларының басын бір үстел басына қосып, мәдениеттерді және өркениеттерді жақындастырмақ. Дәстүрге айналған бұл алқалы бас қосу 14-15 қыркүйекте еліміздің бас қаласында өтеді.

(Соңы 3-бетте)

## КЕЛБЕТ

# БОРЫШКЕРДІ ҚАМАҒАННАН АЙЫППҰЛ САЛҒАН ТИІМДІ

«Әкемді іздеймін!» деп шарасыз жағдайда жүрген бала аз емес. Балалар әкесін тек алимент төлемегені үшін іздейді десеңіз қателесесіз. Себебі, әр бала үшін әкесінің қасында болғаны, өркелеткені, демеу болғаны, тіпті, жай ғана қалқайып қасында жүргені маңызды. Әкесі жетектеп балабақшаға апарған, әкесі сөмкесін ұстап мектептен күтіп алған балалардан бақытты ешкім жоқ. Данышпан қазақ «Отыз мектеп жабылып бір өкенің тәрбиесін бере алмайды» дегенді біліп айтқан. Өкінішке орай, ұл-қызына қаржылық көмек көрсету үшін ғана емес, қамқорлық таныту үшін де қажет екенін көп әкелер түсінбейді.

Біздің өндірісімізге түсетін алимент өндіруге қатысты істер ешқашан азайған емес. Қажыған, тарыққан, киналған аналардың шарасыз күйіне қарап, қол қусырып отыра алмайсың. Барлығы бүгінгідей нарықтық заманда отбасының ауыртпалығын бір өзіне атқару қиын екенін алға тартады. Әрине, дәл қазіргідей қымбатшылық алқымнан қысқан заманда толық отбасылардың өзі балаларын барлық қажетті керек-жарақпен қамтамасыз ете алмай отыр. Ал жалғыз әйелдің табысына қараған отбасының қандай күйде өмір сүріп жатқанын айтып жату артық. Мұндайда алимент балалардың барлық мәселесін шешпегенмен, отбасына біршама көмек. Міне

сондықтан да біз алимент өндіруге өте кірпияз қараймыз.

Алимент өндіру жеке сот орындаушылардың тікелей міндеті екені рас. Дегенмен, бала тағдырына бейжай қарамау үшін бұл мәселені шешуге барлық құзырлы орындар біріге атсалысуы керек. Қоғамда борышкер әкелерге жағымсыз пікір қалыптастырып, бала алдындағы парызы өтемеу – жауапсыздық екенін үнемі ескертіп, санаға сіңіру керек. Соған орай, әкімдіктер көпшілік жүретін, көрнекі жерлерге арнайы билбордтар, плакаттар іліп, борышкер әкелерге тікелей әсер етуге тырысқаны жөн. Бала алдында қарызы бар әкелердің атын жасырмай айтып, әшкерелеу де орынды.

Ұрпағының болашағына алаңдамаған азаматтарға бұл лайық жаза.

Ал жеке сот орындаушылар өз тарапынан бірінші кезекте алиментке қатысты сот актісін тезірек орындап, толық емес отбасына қолдан келген көмекті көрсетуге тырысамыз. Не әкенің мейірімін көрмей, не қаржылық қолдауды сезінбей өскен баланы теріс жолға түсіп кетуден сақтау баршамыздың міндетіміз. Өйткені, қатарынан қалғысы келмеген баланың ерте жастан еңбекке араласуы мүмкін. Ақша тауып, анасына көмектескісі келген бала оқуын ақсатады, қатарынан сырт жүреді. Жұмыс, жұмыс деп жүріп кейбір аналардың бала тәрбиесіне уақыт таппайтыны тағы рас. Ал бүгінгідей ақпараттар ашық, қолжетімді кезде балаларды зиянды ақпараттан қорғау тіпті күрделі. Үйінде бақылау болмаған соң елпілдеген жеткіншектің шалыс баспасына, өмірін бүлдірмесіне кім кепіл? Осының өзі алименттің өте үлкен, өзекті мәселе екенін аңғартады.

Алименттерді төлету – бұл қандай да бір негіздер бойынша берешекті ерікті төлеуден бас тартқан адамдардан ақшаны мәжбүрлеп өндіру процесі.

(Соңы 2-бетте)

## СҮЙІНІШІ

# БАЙҚАУ! БАЙҚАУ!

«ЗАҢ» Медиа-корпорациясы» ЖШС, республикалық «Заң газеті» басылымының мұрындық болуымен өтетін Кемел Тоқаев атындағы детектив шығармалар байқауы биыл да жалғасын табады. Бесінші рет ұйымдастырылып отырған додаға Қызылорда облысының әкімдігі қолдау көрсетпек. Бұйыртса биылғы жүлдегерлерді қазан айының соңына қарай қасиетті Сыр елінде марапаттаймыз.

### БАЙҚАУДЫ ӨТКІЗУДІҢ МАҚСАТЫ:

- детектив жанрының атасы Кемел Тоқаевтан кейін кенжелеп қалған жанрды жандандыру;
- детектив шығармалар жазуға деген көпшіліктің ынтасын ояту;
- шытырман шығармаға қызығушылықты арттыру;
- осы жанрдың көмегімен құқық қорғау, сот, адвокаттық салада еңбек етіп жүрген мамандардың еңбегін дәріптеу.

### БАЙҚАУҒА КІМДЕР ҚАТЫСА АЛАДЫ?

Соңғы үш жылда осы байқауға қатысып, бас жүлде мен бірінші орын алған адамдар байқауға қатыстырылмайды. Басқа үміткерлердің бақ сынауына толық мүмкіндігі бар.

Үміткерлер шығармасын zangazet@mail.ru эл.поштасына немесе Алматы қаласы, Досмұхамедов көшесі 68Б мекенжайына «Байқауға!» деген белгімен жолдай алады.

Байқауға жіберілген материал көлемі А4 форматында 14-шрифтпен жазылғанда 10 беттен аспауы керек. Шығармалар осы жылғы 30 қыркүйекке дейін қабылданады. Белгіленген мерзімнен кешігіп келген еңбектер байқауға қатыстырылмайды. Материалдар «Заң газетінде» және zanmedia.kz сайтында жарияланып тұрады. Сондай-ақ, детектив жанрының талаптарына сай келмейтін шығармалар қазылар назарына ұсынылмайды.

### ЖҮЛДЕ ҚОРЫ ҚАНДАЙ?

Байқаудың бас жүлдесі – біреу, 1-орын – біреу, 2-орын – екеу, 3-орын – үшеу және бес ынталандыру сыйлығы қарастырылып отыр.

Биылғы жылдың бір ерекшелігі – оқырманның дауысына (дауыс онлайн жағдайда беріледі) ең көп ие болған үміткерге бірінші орынға тең дәрежеде жүлде тағайындалады. Сонымен бірге, жазуға қабілеті бар студент жастарды, жоғары сынып оқушыларын ынталандыру мақсатында да арнайы жүлде белгіленіп отыр.

Ал, құрметті оқырман!  
БАЙҚАУҒА ҚАТЫСЫП, БАҚ СЫНАҢИЗ!  
ІСКЕ СӨТ!



## КЕЛБЕТ

# ТАҒДЫРЫ ҚИЫН ТҰЛҒА

Мырзақадыр Нұрбаевтың есімі өз заманында танымал болғанымен, бүгінгі ұрпақ үшін беймәлім. Олай дейтініміз, мақаламызға өзек еткелі отырған тағдыры күрделі тұлға жайлы деректер жоқтың қасы. Содан болар, Қазақ КСР Жоғарғы Сотының төрағасы, Қазақ КСР Юстиция Халық Комиссары, Юстиция министрі қызметтерін атқарып, екі рет Қазақ ССР Жоғарғы Советінің депутаты, бір рет Қазақстан Компартиясы Орталық Комитетінің мүшелігіне сайланған, республикамыздың заң саласының дамуына өлшеусіз үлес қосқан Мырзақадыр Нұрбаевтың еңбегі мүлде елеусіз қалды. Осы олқылықтың орнын толтыру, абзал азаматтың есімін мәңгі есте қалдыру, халыққа жеткізу бүгінгі ұрпаққа парыз.

Мырзақадыр Нұрбаев 1909 жылы, Оңтүстік Қазақстан облысы, Мақтаарал ауданындағы Елтай ауылында туған. Ол 1929 жылы бастауыш мектеп, одан кейін төрт айлық есепшілер курсы бітіреді. Әкесі Қазан төңкерісіне дейін де, одан кейін де өзінің азын-аулақ шаруашылығымен айналысқан адам.

(Соңы 5-бетте)









## ИГИС

ҚР ИІМ Есболатов атындағы Алматы академиясында Ахмет Байтұрсынов атында зал мен цифрлық кітапхана ашылды. Ашылу салтанатына Алматы қаласы ПД бастығы, полиция генерал-майоры Арыстанғани Заппаров, ИІМ ардагері, полиция генерал-майоры Жан Кенжетәев, «Қазақ тілі» халықаралық қоғамының вице-президенті Анар Фазылжан және оқу орнының басшылығы мен тыңдаушылары қатысты.

## ҰЛТ ҰСТАЗЫНА ҚҰРМЕТ



анттар мен магистранттар, бастапқы даярлық курстарының тыңдаушылары білім алады. Сондай-ақ, ішкі істер органдарының қызметкерлері үнемі біліктілікті арттыру курстарынан өтіп отырады.

Академияда «Мобильді академия» жобасы іске асырылуда және қашықтан оқыту нысаны кеңінен енгізілуде. Арыс-

танғани Заппаров атап өткендей, цифрлық кітапхана полиция қызметкерлері үшін әдебиетке жол ашып, практикалық қызмет барысында да жақсы көмек болады.

Кітапхананың электрондық форматын оқырмандар аясында кеңейтеді. Оқу орнында арнайы және жалпы әдебиет кітапханасы, яғни екі кітапхана қоры бар. Жалпы қор 300 мыңнан астам кітапты құрайды. Академияда оқырмандардың қызығушылығын арттыруға ерекше көңіл бөлінеді. Кітап клубы ұйымдастырылып, оған қатысушылар оқыған шығармалары туралы пікірлерімен бөліседі. Сонымен қатар, академия қызметкерлері де кітап қорын толықтыруда.

Динара САҒЫНДЫҚОВА  
Фото авторы  
Лилия САНДЫБАЕВА

Іс-шараға қатысушылар Ұлт ұстазының ағартушылық рөлін айта келе, «Baitursynov Library»-дің ашылуы Ахмет Байтұрсыновтың мерейтойына орайластырылғанын атап өтті.

Академияның цифрлық кітапхана қоры ғылыми және оқу басылымдарымен, әдістемелік құралдармен және көркем кітаптармен толықтырылған. «Электронды кітапханаға келушілер қолда бар библиографиялық акпараттардың көмегімен қажетті дереккөздерді жедел таба алады. Мұндай формат білім алушылардың барлық санаттары үшін, соның ішінде қашықтан білім алушылар үшін де өте қолайлы», – деді академия бастығы полиция полковнигі Айдар Сайтбеков.

Оқу орнында жоғары және орта басшы құрамдарды даярлау факультеттерінің тыңдаушылары, доктор-



## ТҮЗЕУ МЕКЕМЕСІ

## ЖАҚЫНДАРЫ – ЖӘРДЕМШІ

Сотталғандар мен жақындарының кездесуі кесілген жазаға байланысты. Мәселен, бір жылдың ішінде сотталған азаматпен қысқа мерзімге – 2 сағатқа және ұзақ уақытқа – 2 күнге кездесуге рұқсат алуға болады.



Жақынымен жүздесіп, сағынышын басуды төрт қабырғаға қамалып отыратын жазасын өтеуші әр жанның тағатсыздана күтетіні анық. Сондай жанның бірі С. есімді азамат. ҚР ҚК-тің 174-бабы бойынша сотталған. Жаза мерзімінің соңғы бөлігін осы Қызылордадағы Қылмыстық-атқару жүйесіне қарасты № 68 мемлекеттік мекемесінде (тергеу изоляторы) өтеуде. Білімі жоғары. Египетте оқып, діни білім алған. Бірақ, сол алған білімін дұрыс жүзеге асырмады. Адасты. Санасы теріс бағыттағы діни насихатпен тұманданған ер азамат бүгінде сол кездегі діни көзқарастарынан мүлдем арылған. Бұл әрине, тәрбие бөлімі қызметкерлерінің соның ішінде теологтардың үздіксіз жүргізген ерен еңбегінің нәтижесі.

– Тергеу изоляторында жазамды өтеп жатқаным екі жылдан асты. Осы жылдар аралығында мекеме қызметкерлерінің ұйымдастырған әртүрлі іс-шараларына қатысып, теологтар мен мешіт имамдарының дәрістерін тыңдап, қателіктерімді түсіндім. Бұл сынақ менің отбасым үшін өте ауыр болды. Өмірлік серігім мен төрт перзентім мені қолдап, кездесуге келіп тұрады. Бүгін міне, мындаған шақырымды артқа тастап, Ақтөбеден әйелім мен

кіші ұлым ұзақ мерзімді кездесуге келіп отыр. Ұлымды көріп, көңілім көтеріліп қалды. Енді екі күн әйеліммен шүйіркелесіп, әңгімелесіп, іштегі мұң-шерімді босатамын. Бұйырғанда бостандыққа шығуыма 6 ай қалды. Бұл мекемеге әйелім кездесуге осымен екінші рет келіп отыр. Кездесуге рұқсат берген мекеме басшылығы мен ұйымдастырушы қызметкерлерге алғыс білдіремін. Әйелімнің айтуы бойынша, үлкен ұлым полиция қызметкері боламын деп жүр екен. 7 жыл қамауда болып, білімі мен тәрбиесіне көңіл бөле алмадым. Ал, екі күн бауырыма басып жатқан кіші ұлымның бостандыққа шыққан соң, сабағын өзін оқытамын. Ұлықты ұл етіп тәрбиелегім келеді – деп, ізгі мақсаттағы ойларын жеткізді сотталған азамат.

«Мұндай, экстремизм-терроризм баптары бойынша сотталған азаматтарды оң бағытта өзгерту өте қиын. Ол үшін біз көп еңбек етеміз. Сотталғандар жақындарымен жүздескен соң, жан тыныштығын табады. Мінез-құлқы өзгеріп, көтеріңкі көңіл-күйде болады, – дейді АКАӨПТЖБ-нің бастығы, әділет капитаны А.Тұрманов.

Раушан НАРБЕКОВА

## ТАҒЫМ

## АЛАШТЫҢ АРДАҚТЫСЫ

Қазақ халқының аңсап жеткен азаттығы мен тегеурінді тәуелсіздігі туған тілімізді өз тұғырына қондырды. Осы жолда қаншама тар жол, тайғақ кешулерден өтті. Сөйтіп, еліміз, тіліміз деп күрес майданына шыққан көптеген асыл азаматтардың зор қажыр-қайратының арқасында, қазақтың қара қылды қақ жарған қайсар тілі мемлекеттік мәртебеге ие болып, еңсесін тіктеді.

Осындайда Алаш ардақтысы, Ұлт ұстазы, тіл білімінің атасы атанған Ахмет Байтұрсынұлының: «Өз тілімен сөйлескен, өз тілімен жазған жұрттың ұлттығы еш уақытта жоғалмайды. Ұлттың сақталуына да, жоғалуына да себеп болатын нәрсенің ең қуаттысы – тілі. Сөзі жоғалған ұлттың өзі де жоғалады» деген дара даналығында қаншама мән бар десеңізші?!

Ендеше, қазақ тілінде іс қағаздарын дұрыс жүргізіп, әртүрлі құжаттарды сауатты жазу – ел мәдениетінің ғана емес, сонымен қатар өркениетті қоғам мен мықты деген мемлекеттің де жалпы даму деңгейінің көрнекті көрсеткіші екендігі анық.

Әрине, ұлт маңдайына біткен ұлы тұлға, қазақ тілі білімі мен әдебиеттану ғылымдарының негізін салушы ғалым, ұлттық жазудың реформаторы Ахмет Байтұрсынұлының туған тіліне деген құрметі жоғары болды. Ол туған тілін бәрінен биік қойды. Оның тіл туралы тағлымдарын тыңдай отырып, өз ұлтына, тіліне деген шексіз жаныштығына қайран қаласың. Соның бір айғағындай мына бір сөзінде таудай тағлым бар екендігі сөзсіз:

«Егер де біз қазақ деген ұлт болып тұруды тілесек, қарнымыз ашпаудың қамын ойлағандай, тіліміздің де сақталу қамын қатар ойлау керекпіз». Демек, мұны біз тек ұран сөз ретінде қолданбай, іс жүзінде жүзеге асуына ат салысуымыз қажет.

Биыл өмірі аңызға, шығармашылығы үлкен маңызға ие болған Ұлт ұстазы Ахмет Байтұрсынұлының 150 жылдық мерейтойы аталып өтілуде. Ахмет Байтұрсынұлы (1873–1938) – қазақ халқының XX ғасырдың басындағы ұлт-азаттық қозғалысы жетекшілерінің бірі. Қоғам қайраткері, ақын, педагог, публицист, түркітанушы, ағартушы, аудармашы, қазақ тілі білімі мен әдебиеттану ғылымдарының негізін салушы ғалым, ұлттық жазудың реформаторы.

1910 жылдары А. Байтұрсынұлы қазақ облыстарынан тысқары жер аудару жөнінде шешім қабылданды. Осы шешімге сәйкес, ол 1910–1917 жылдары Орынборда тұрды. 1913–1918 жылдары тұңғыш жалпы ұлттық «Қазақ» газетін шығарып тұрды. Бүкіл қазақ жұрты «Қазақ» газетін оқып, оны мен солын тани бастады, жана

қалыптасып келе жатқан ұлт зиялыларының саяси санасы осы басылым арқылы жетілді. А. Байтұрсынұлының алғашқы кітабы – «Қырық мысал» 1909 жылы жарық көрді. Бұл еңбегінде Ресей отаршыларының зорлық-зомбылығын, елдің ауыр халін тұспалдап жеткізді. Ол мысал жанры арқылы халықтың саяси санасын оянуына ықпал етті. Ақынның азаматтық арман-мақсаты бейнеленген өлеңдері «Маса» деген атпен жеке кітап болып жарық көрді (1911). «Масаның» негізгі идеясы – жұртшылықты оқуға, өнер-білімге шақыру, еңбек етуге үндеу. Ақын халықты қараңғылық, енжарлық сияқты кемшіліктерден арылуға шақырды.

Ол туралы ақын Мұхтар Әуезов: «Ахаң ашқан қазақ мектебі, Ахаң түрлеген ана тілі, Ахаң салған әдебиеттегі елшілік ұраны – «Қырық мысал», «Маса»; «Қазақ» газеті мен қан жылаған қазақ баласына істеген еңбегі, өнер-білім, саясат жолындағы қажымаған қайраты, біз ұмытсақ та, тарих ұмытпайтын істер болатын» деген екен.

Ахмет Байтұрсынұлы қазақ әліппесі мен қазақ тілі оқулықтарын жазуды 1910 жылдардан бастап қолға алады. Онымен қоса қазақ графикасын жасауға кіріседі. Қазақ графикасының негізіне, қазақтың мәдени дүниесінде көп ғасырлық дәстүрі бар, өзге түркі халықтары да пайдаланып отырғандықтан, туыстық, жақындық сипаты бар араб таңбаларын алады.

Оны қазақ фонетикасына икемдейді, ол үшін қазақ дыбыстары жоқ таңбаларды алфавиттен шығарады. Арабша таңбасы жоқ дыбыстарына таңба қосады. Қазақ тілінің жуанды-жіңішкелі үндестік заңына сай жазуға ыңғайлы дөйкеші белгі жасайды. Сөйтіп 24 таңбадан тұратын өзі «Қазақ жазуы» деп, өзгелер «Байтұрсынұлы жазуы» деп атаған қазақтың ұлттық графикасын түзеді. Ұлт ұстазы туралы деректерді бір ғана мақаланың көлеміне сыйғызу мүмкін емес. Бұл тек А.Байтұрсынұлының қасиетті қазақ тілі туралы қағидалары мен тіл құралының жасалуы жолындағы өлшеусіз еңбектерін ғана жеткізе білгеніміз.

Сайып келгенде, қазақылықтың қаймағы бұзылмаған Қызылқоға ауданы да, Ұлт ұстазының қазақ тілі туралы айтқан даналықтары мен қағидаларын берік ұстанып, мемлекеттік тіліміздің мәртебесін арттыру жолында айтарлықтай игі істер атқарып келеді.

Б.АБДУАЛИЕВА,  
Қызылқоға аудандық сотының бас маманы  
АТБІРАУ ОБЛЫСЫ

## БАСТАМА



## Пробациядағылар мамандық меңгеруде

Жанакорған аудандық ішкі саясат бөлімінің «Жастар ресурстық орталығы» КММ қолдауымен, «Жастар одақтары» ҚБ-нің ұйымдастыруымен ауданның жұмыссыз жастары мен пробация бақылауындағы жастарға өмірге қажетті дағдыларды үйрету мақсатында қысқа мерзімді курстар ұйымдастырылды. Курс аясында жастарға бүгінгі күні нарықта үлкен маңызға ие болып табылатын СММ дағдылары, Таргет, Мобилография бойынша кең көлемді акпараттар берілді.

«Курстан көптеген мағұлмат алдым. Өзім әлеуметтік желілермен жақсы жұмыс жасайтын едім. Мамандар жалпы парақшаларды қалай басқару керектігін, қалай қолдануды фото-видео контент, пост жазу, сторис жасауды үйретті. Ешқандай қиындығы жоқ, телефон мен интернет болса жеткілікті. Мобилографияны да меңгере бастадым. Телефонмен сапалы бейне түсіріп, бизнес орындарына жарнама жасау арқылы қаражат табуға болады екен. Бүгінгі күресті ұйымдастырушыларға алғысымыз шексіз», – деді есептегі азамат.

Дана ДОСТАНОВА,  
Қызылорда облысы бойынша ҚАЖД



